

Utoqqalinermi siusinaartumillu pensionisiat allanik isertitaqarnerit nassatarisaannik annikillineqartarunnaarnissaasa kinguneqaataannik pillugit Naalakkersuisut kingusinnerpaamik UPA2021-mi nassuiaammik saqqummiussinissaannik peqquneqarnissaat pillugu Inatsisartuni aalajangiiffigisassatut siunnersuut.

*(Inatsisartunut ilaasortamit Siverth K. Heilmann, Atassut, saqqummiunneqartoq)*

pillugu

## **Ilaqtariinnermut Peqqissutsimullu Ataatsimiititaliap**

**siunnersuutip aappassaaneerpeqarneranut**

### **ISUMALIUTISSIISUTAA**

Ataatsimiititaliap suliarinninnermini makku ilaasortarai:

Inatsisartunut ilaasortaq Mala Høy Kúko, Siumut, siulittaasoq

Inatsisartunut ilaasortaq Stine Egede, Inuit Ataqtigiit, siulittaasup tullia

Inatsisartunut ilaasortaq Anna Wangenheim, Demokraatit

Inatsisartunut ilaasortaq Aqqa Samuelsen, Inuit Ataqtigiit

Inatsisartunut ilaasortaq Karl-Kristian Kruse, Siumut

Inatsisartunut ilaasortaq Malene Vahl Rasmussen, Demokraatit

Inatsisartunut ilaasortaq Mikivsuk Thomassen, Inuit Ataqtigiit

UKA2019 ulloq 25. september 2019-imi siullermeerinerup kingorna ataatsimiititaliap siunnersuut misissorpaa.

### **Siunnersuutip imarisaa siunertaalu**

Utoqqalinersiat siusinaartumillu pensionisiat allanik isertitaqarnerup kingunerisaanik ilanngarneqartanninnissaasa kingunerisassaat pillugit Naalakkersuisut allaaserisaqaqqullugit peqquneqarnissaat siunnersuuteqartup kissaatigaa. Utoqqalinersiallit siusinaartumillu

pensionisiallit pensionisiaasa saniatigut isertitaqarsimagunik  
annikillisaavigineqartannginnissaat qanoq kinguneqassanersoq misissorneqarnissaa  
siunertaavoq.

### **Ataatsimiititaliap siunnersuummik suliarinninnera**

Aalajangiiffigisassatut siunnersuutip utoqqalinersialinnut siusinaartumillu pensionisialinnut tunngasoq pillugu aalajangiiffigisassatut siunnersuutip akuerineqarneratigut Naalakkersuisut nalunaarusiamik suliaqassasut aallarniutigalugu ataatsimiititaliamit oqaatigineqassaaq. Naalakkersuisut inatsisissatut siunnersuutaannut (UKA2019/144)-mut utoqqalinersiat inatsisiliuunniarneqarnerannut tunngatillugu siamasinnerusumik pensioninut tunngasut misissorneqarnissaat siunnersuuteqarnikkut kissaatigineqartoq ataatsimiititaliamit ilanngullugu maluginiarneqarpoq.

Piffissami matumani *siusinaartumik pensionisiat pillugit iluarsartuussinerup nalilersorneqarnissaa, ilaatigut maannakkut atuuttut annikilliarortinneqarnerisa kingunerisinnaasaat* pillugit Naalakkersuisunit nalilersorlugit aallartinneqarsimanerat akissuteqaatikkut ataatsimiititaliamit maluginiarneqarpoq.

Siunnersuut una akuerineqassappat suliniutit aallartinneqareersut suliareqqullugit kissaatigineqartut Naalakkersuisunit ilanngunneqassappata ajoqutaanaviannngilaq.

Aalajangiiffigisassatut siunnersuut akuerineqassappat nalunaarusiaq minnerpaamik makkuninnga imaqassasoq ataatsimiititaliamit ima paasineqarpoq:

- Utoqqalinersianut siusinaartumillu pensionisianut aningaasartuutaanerusussatut naatsorsuutigineqartut naatsorsorneqarsimassasut.
- Utoqqalinersiallit siusinaartumillu pensionisiallit allanik isertitaqarnermikkut utoqqalinersiaannik siusinaartumillu pensionisiallit pensionisiaannik ilannganneqarnermikkut ilannganneqannginnermikkuluunniit iluaqutigisinnaasaat naatsorsorneqarsimassasut.
- Utoqqalinersiallit siusinaartumillu pensionisiallit allanik isertitaqarnermikkut ilannganneqassaarnerisigut aningaasatigut ineriartornerat naatsorsorneqassasoq.

Nalunaarusiaq makkuninngattaaq imaqassasoq ataatsimiititaliamit kaammattuutigineqarpoq:

- Akileraarutit aqputigalugit utoqqalinersiallit siusinaartumillu pensionisiallit Nunatta Karsianut akileeqataasarnerat inuttut qanoq kinguneqassanersoq sukumiisumik misissorneqassasoq.
- Inuit sulisinnaasut isertitaqarnerulernerisa pitsaasumik pitsaanngitsumillu kingunerisinnaasaat misissorneqassasoq.

Nalunaarusiaq taamaattoq utoqqalinersiallit siusinaartumillu pensionisiallit pensionisiatik ilanngaavigineqanngikkaluartut aningaasaqarnermikkut imminnut pilersorneranni aningaasaqarnikkut inuttullu kingunerisinnaasaat pillugit ilisimasaqarnerulernermik aqputissiuussissaaq.

### **Siunnersuutip aningaasatigut kingunerisassai**

Inatsisartut suleriaasianni § 33, imm. 1-imi allassimavoq aalajangiiffigisassatut siunnersuutip piviusunngortinneqarnissaanut aningaasatigut allaffissornikkullu kingunerisassai siunnersuummut tunngavilersuutitut allanneqassasut.


Siunnersuutip piviusunngortinneqarneratigut aningaasatigut kingunerisassai siunnersuummut naapertuuttut ataatsimiititaliamit maluginiarneqarpoq. Taamaalilluni aningaasartuutit nalunaarusiami siunnersuutigineqartut ukiumut ataatsimut 500.000 kr.-unissaannut naapertuuttoq siunnersuuteqartup missiliuuppa.

Allatut naliliinissamut ataatsimiititaliaq pissutissaqanngilaq.


### **Ataatsimiititaliap inassuteqaatai**

Ataatsimiititaliap **isumaqatigiittup** siunnersuut **itigartinneqassasoq** inassutigaa.

Taama oqaaseqarluni isumaliutissiissumilu allassimasunut paasinnilluni ataatsimiititaliap siunnersuut aappassaaniigassanngortippaa.




Mala Høy Kúko  
Siulittaasoq  
*Siumut*



Stine Egede  
Siulittaasup tullia  
*Inuit Ataqatigiit*



Anna Wangenheim  
*Demokraatit*



Aqqa Samuelsen  
*Inuit Ataqatigiit*



Karl-Kristian Kruse  
*Siumut*



Malene Vahl Rasmussen  
*Demokraatit*



Mikivuk Thomassen  
*Inuit Ataqatigiit*